

# Rapport da gestiun 2018 dil president dalla pleiv catolica romana s. Martin, Trun

Aultstimau sur Tomasz  
Preziadas parochianas, stimai parochians

En miu tierz rapport sco president dalla baselgia catolica romana s. Martin da nossa vischnaunca dundel a vus las necessarias informaziuns sur dil passau en nies cumin-baselgia duront quei onn d'uffeci.

## 1. General

Era duront gl' onn vargau ei la religiun stada in tema per las medias e quei en special buca mo en connex cun igl islam, mobein era la practica dalla baselgia catolica en connex cun violenza ed abusit (Missbrauch) ch'ei schabegiaus e vegnius practicaus duront decennis entras persunas ch'eran engaschadas en l'instrucziun sil sector da differentas instituziuns dalla baselgia. Discussiun sur dil zölibat ha ei era dau en nossa stretga regiun, quei ord motivs dall'abdicaziun dil plevon d'ina pleiv vischinonta.

Il laic studegia buca grondas teorias, na el setegn vid quei che cuora e passa en sia stretga vischinonza. Quei vala denton mo aschi ditg ch'ina pleiv vegn pastorada activamein. Il problem da munconza da spirituals vegnin era nus plaunsiu a sentir pli fetg, han differentas pleivs giu uonn sur pli liung temps negin agen plevon. Nossa pleiv ha il cletg dad haver giu durond gl' onn vargau in pastur engaschau, iniciativ e cun in bien maun per sias nuorsas. Persuenter essan nus tuts a nies augsegner, **sur dr. Tomasz Piotr Drwal**, fetg engrazieivels. Il meins november ei nies plevon vegnius elegius sco **decan dalla Surselva**. En sia nova funcziun giavischein ad el bia satisfacziun.

### a) Suprastonza

La collaboraziun denter la suprastonza ha funcziunau per cumpleina cuntentientscha. En pliras sedutas communablas ei la suprastonza seradunada ed ha liquidau ils problems. Pensums delegai ad in ni l'auter per liquidaziun (art. 24 dalla constituziun) ha il responsabel sli gau e sch'igl ei stau necessari ha la suprastonza s'ancziunau quella decisiun. La collaboraziun cun il cussegl pastoral cun sia iniziativa presidenta **Cristina Derungs-Lutz** funcziunescha fetg bein.

In pli grond engaschi dalla suprastonza han las contractivas per in dretg da baghegiar limitau per il beneficatat a Nossadunna dalla Glisch pretendiu. En la radunonza generala extr'ordinaria dils 21 da november 2018 han il parochins/Anas sancziunau la fatschenta e dau alla fam. Zürcher-Gasser il dretg da baghegiar per ils proxims 40 onns. Ultra da quei ei il project «pagina d'internet» vegnius instradaus.

### b) La pastoraziun

Grazia agl engaschi da nies zun preziau plevon sur Tomasz Piotr, ch'ei sengaschous uonn specialmein per Schlans extr'ordinariamein, mo era cun igl agid da tut ils auters gremis dallas pleivs e caplania en special la minuziusa lavur dil secretariat, dil cussegl pastoral e dalla catecheta ha la pastoraziun funcziunau senza pli gronds incaps. La lavur da bia buns mauns ei il fretg che nus astgein raccoltar dumengia per dumengia.

### c) Instrucziun religiosa

Nus essan sefitschentai cun il model d'instrucziun religiun ed etica ch'ei ius per il scalem bass en vigur cun il niev onn da scola. Naven digl atun dat ei per tuttas classas pli mo in'ura da religiun, l'autra ura vegnan ils affons instrui en il rom d'etica. Nus formein cun la vischnaunca da Sumvitg in consorzi da scola. Ensemen cun la pleiv da Sumvitg e cul cussegl da scola dil consorzi havein nus encuretgei tgei pusseivladads che nus havein da procurar l'instrucziun religiosa necessaria enteifer il niev plan d'instrucziun cantunal. Il resultat da quella discussiun ha menau nus tier la decisun che nus vegnin cun lavur da projects d'instrucziun ordeifer igl urari da scola a saver porscher a nos affons l'instrucziun religiosa supplementara. Ils details havein fixau ensemen cun nies plevon e nossa catecheta **Isabelle Defuns-Gamboni**.

### d) Veta e mort

Mintgin ha siu agen pensum cheu sin tiara e quel entscheiva cun la naschientscha e finescha cul viadi en la perpetnada. Veta e mort stattan datier in da l'auter. Duront il davos onn havein nus stuiu prender cumiau da caras concristianas e concristians, nus havein era saviu selegrar ensemen cun ils geniturs da niev battegiar.

Davos la statistica stattan muments grevs mo era uras legrevilas.

Battens	5 da Trun e 3 da Schlans
Premcommunicants	5 affons
Cresmants	15 affons
Nozzas	1 da Trun ed 1 da Schluein
Extrada ord la baselgia	6
Mortoris	11 a Trun

A tuttas defunctas e defuncts engrazièl per il bien che nus havein astgau retscheiver dad els. Allas famiglias en malencurada esprimin nus nossa pli sincera condolientscha.

## 2. Engaschis en la pleiv

Enteifer la communitad cristiana sin territori da nossa vischnaunca havein nus ina lunga roscha da fideivlas collaboraturas e collaboraturs e quei duront pli lung temps ora. Nus havein in zun activ cussegl pastoral, fideivels e cunscienzius ugaus capluttas ed ina massa autras persunas che fan el zuppau ina gronda lavur ch'ins vesa insumma buca. Mintg'onni hai giu mess accents en ils quals jeu hai relatau da lur lavur. Entochen ussa ei quei stau: Il cussegl pastoral, la lavur cun las ministrantas e ministrants sco era la lavur dils ugaus capluttas e dils organists. Uonn lessel buca menziunar ina gruppaziun speciala, mo bein punctuar la lavur che vegn prestada voluntariamein duront igl onni ora.

Allas persunas sengaschadas lessel far in compliment per tut lur engaschi per il beinstar da nossa baselgia: La lavur cun las ministrantas ed ils ministrants ed il survir messa, lecturas, catecheta, l'organisaziun entuorn mintga sepultura, ils organists, ils chors, ils dirigents dil chor da sepultura ed dil chor cecilian, l'uniun da mummas e dunnas, l'uniun da giuventegna cun ornar l'intrada alla baselgia cun tschuppi e fluras, la musica instrumentala per embellir las fiastas e secapescha era tuttas persunas ch'orneschan e schubregian las baselgias.

En special lessel menziunar igl engaschi da dunna **Rilana Cadruvi-Scherrer**. Ensemen cun siu um **Clau Scherrer** e nossa catecheta Isabelle Defuns organiseschan els in chor d'affons ad hoc, il qual conta mintgamai tier specialas occasiuns nua ch'ils affons statan el center dil survetsch divin. Era all'uniun da mummas e dunnas engrazièl per tut lur engaschi. Ellas organiseschan il solver per ils affons suenter las messas da scola, han quitau dalla vestgadira dils premcommunicants ed il bi usit dils retgs sco era per il lavar ora tut ils sanctuaris. Per gl'entir engaschi dallas mummas e dunnas lein esser ad ellas engrazièvels. Era nossas ugaus e nos ugaus caplutta s'auda ei in special engraziament, preparan els mintgmai las capluttas per il survetsch divin e han quitau dalla facultad da mintga caplutta. Cunquei che nus havein per la caplutta Nossadunna dalla Neiv a Schlans negin ugau, procura dunna **Renata Pfister-Maissen** voluntariamein igl usitau quitau dalla caplutta.

Buca emblidar d'engraziar lessel per las activitats entuorn las processions e sepulturas, A **Victor Tuor** (entochen d'atun) e **Giusep ed Isabelle Defuns** per il riug da sepultura, allas **giuvnas** per il purtar la Nossadunna mintgamai da perdanonza sco era tut quels che **portan ils cavanuns** tier mintga fiasta. Alla **suprastonza communal** saudi in cordial engraziament per purtar mintga fiasta ecclesiastica il balduchin. Aschia vegnan fiastas embellidas e la veta da cuminonza viva.

A gl'entir **cussegl pastoral**, cun l'engaschada presidenta Cristina Derungs, actuara e las meinadras da gruppa ditgel in sincer engrazièl fetg per lur bien sustegn da nies plevon. Nus havein in cussegl pastoral che sengascha cun tgierp ed olma per il beinstar da nossa cuminonza.

## 3. Petgas da nossa cardientscha

### a) Ductrina

Ella scola da Trun vegn dau ductrina en tuttas classas e cheutras tschentau in bien fundament religius per ils affons. L'instrucziun religiusa ei vegnida dada: Tiarza classa primara dil plevon; 1. e 2. sco era la quarta primara dalla premurada catecheta **Isabelle Defuns-Gamboni**. Ella sengascha fetg cun ils affons per ils survetschs divins per familias. La 5. e 6. classa vegn instruida da **Hubert Venzin** che prepara medemamein l'instrucziun dalla s. Creisma ed il scalem ault vegn daus da **Gabriela Cabalzar-Lombriser**.

### b) Fatgs da Baselgia

Tuts ils fatgs da Baselgia vegnan avon el rapport dalla presidenta dil cussegl pastoral.

### c) Manteniment dils beins

Per gl'usitau manteniment dils baghetgs sacrali sco era tier las casas pervendas vegn igl administratur a dar plaid e fatg.

#### 4. Personal

##### a) Lecturas e parter ora la s. communiun

Allas lecturas: **Annamaria Cavigelli-Tschuor**, **Gabi Cajacob-Mirer**, **Isabelle Defuns-Gamboni**, **Esther Tomaschett-Monn** e **Manuela Wolf-Tomaschett** per Trun, **Marta Bundi-Giger**, **Josefa Wolf-Tomaschett**, **Anita Orlik-Vincenz** e **Daniela Vincenz-Cavelti** per Zignau engrazieli cordialmein per lur buns survetschs ch'ellas fan dumengia per dumengia.

##### b) Organists

Suenter in engaschi da varga 57 onns sco organist dalla baselgia parochiala a Trun ei nies beinmeritau organist, **Albert Decurtins-Capaul**, sedicius, cun la fin november, da surdar siu uffeci sco organist a forzas pli giuvas. Plevon, suprastanza sco era parochianas e parochians ein ad el zun engraziavels per ils nundubiteivels merets en favur da nossa pleiv e selegran d'astgar guder mintgaton ina dumengia ni l'autra, siu accumpignament musical.

Sin nos inserats e nossas stendas personalas d'anflar in organist stabel per nossa baselgia parochiala havein giu negin success. Mo tuttina ein las suandontas personas promptas da segidar cun nus.

- **Clau Scherrer** ei prompts da sunar l'orgla mintgagada cura el ei disponibels e buca s'engaschaus enzanua auter (ca. 2 gadas al meins).
- **Albert Decurtins** ei prompts da sunar vinavon ca. inagada al meins.
- **Jacinta Jacomet-Lombriser** da Mustér segida era ca.1-2 gadas al meins.

Ei dat halt era dumengias nua nus havein negin accumpignament cun l'orgla. Per quella situaziun supplichen nus vus da haver capientscha.

Tier sepulturas ei Albert silmeins entochen primavera vinavon prompts sa sunar l'orgla Era **Claudio Simonett** da Mustér ei prompts da sunar da sepulturas suenter che Albert cala.

A **Claudio Vincenz** engraziain nus cordialmein per la promptadad d'embellir dumengia per dumengia las s. messas cun musica sacrala en la baselgia da Zignau. Mo era als organists dil chor cecilian **Gieri Maissen**, **Clau Scherrer**, **Flurin Monn** e **Flavio Bundi** schein in sincer "Dieus paghi".

##### c) CalustrAs

Dunna **Claudia Hasegan** ha adicau la primavera sco calustra per Schlans. Igl ei reussiu d'engaschar dunna **Georgina Flepp-Cahannes** da Dardin sco nova calustra. Sur Tomasz ha per Schlans ni organist, ni ministrants ni lectura. Quei ei buca ina caussa che secapescha da sesez. Allas dunnas da Schlans: Renata, Stefania ed Ursulina che segidan adina puspei ditgel in sincer engrazel fetg.

Special engraziament admittel allas calustras ed als calusters: **Gabi e Georg Cajacob-Mirer** per la baselgia parochiala, durant il temps da reconvalescenza dalla calustra Gabi ha la calustra da Schlans segiadau ora; **Letizia Rensch-Tomaschett** per la baselgia filiala da Zignau, **Georgina Flepp-Cahannes** per la baselgia da Schlans sco era **Tarcisi Guldimann** per Nossadunna dalla Glisch. Senza lur gronda lavur el zuppau funcziunas nies sistem buca. Ei vegn prestau bia e buna lavur nunveseivla, mo pauc da lur lavur vegn enconuschenta allas parochianas e parochians.

#### 5. Renconuschientscha ed engraziament

Tgei fuss ina cuminonza senza la lavur da biars funcziunariAs. Quella cuminonza essas vus che separticeps alla veta religiosa en nossas pleivs e caplania cun assister allas s. messas ni d'altres purschidas. Persuenter lessel admetter il duu engraziament, sperond che nossa cuminonza resti activa era el temps da desinteress per la religiun, sco era per nossa Baselia catolica romana. Nies zun premurau plevon, sur Tomasz vegn sustenius digl engaschau cussegl dalla pleiv cun la premurada presidenta Cristina Derungs e l'iniziativa catecheta Isabelle Defuns-Gamboni che fa cun lur team in bien fundament, sin il qual nus savein baghegiar si nossas activitads cristianas.

In sincer e profund engraziament ei il minimum ch'jeu sai admetter a mes consuprastonts sco era alla revisura **Erna Nay-Petschen** ed al revisur **Gion Friberg** che sustegnan la suprastanza durant gl'entir onn ora.

Enten il rapport hai menziunau plirs engraziaments, naven da sur Tomasz tochen tier las gidontras e gidonters davos las culissas ed jeu less buca repeter quels, mobein sutlingiar che miu "**Dieus paghi**" vegn da cor.

Buca emblidar lessel Vus, preziadas parochianas e parochians, che segideis adina puspei sin ina u l'otra moda morala ni finanziaria per il beinstar da nossa pleiv ni documenteis, entras vossa preschientscha, dumengia per dumengia vies interess per ils fatgs da nossa religiun.

Sco cuminonza sa la veta da pleiv mo exister cun il sustegn da bia mauns e sur da quels disponin nus. Per tut quei agid e sustegn seigi engraziau da tut cor.

Trun, mars 2019

*Serafin Rensch, president*